

第一 á 是路尾？

耶穌坐落來，叫十二使徒 óa 來，kā in 講：「人若 ài beh 做第一，tiòh 做眾人 ê 路尾，mā tiòh 做眾人 ê 差用。」（《全民台語聖經》馬可福音 9：35）

耶穌 tú kā 祂 ê 門徒講祂 teh beh 遭遇災難，koh beh 為別人犧牲性命。M̄-koh，祂一下講 soah，祂 ê 門徒 tòh 開始互相爭論。

耶穌問講：「Lín 是 teh 冤啥物？」，m̄-koh，in 恬恬無出聲。因為耶穌已經知影 in 是 teh 爭論啥人 siōng 大 ê tai-chì，所以祂就對 in 講：「原來 lín 想 beh 做第一 ê？Án-ne，lín tiòh 去做 siōng 路尾 ê，成做所有 ê 人 ê 僕人。」

即使是兩千年後 ê 現今，這 iáu 是一個革命性 ê 觀念，因為它違反現代世界運作 ê 前提：「Peh 到 siōng koân，然後留 tī hia。」當耶穌講咱必須變成所有 ê 人 ê 僕人 ê 時，祂 ê 意思並 m̄ 是叫咱 m̄-thang 充分使用咱 ê 才能 kah 能力；祂 ê 意思顛倒是講咱 m̄-thang 主宰別人，á 是無惜別人 ê 代價來努力追求優勢。事奉別人是基督宣教 ê 精隨：「因為人子來 chit-ê 世間 m̄ 是 beh hō 人服事，反 tng 是 beh 來服事人。」（馬可福音 10：45）。

基督為祂 ê 門徒，mā 是為咱，phah 開一個挑戰性 ê 生活方式。對咱來講，用人類 ê 標準，á 是用耶穌 ê 標準 khah 容易成功？若是咱 phah 算開始 beh 符合祂 ê 命令，咱 tiòh 必須 án 怎改變 leh？

Tú 親像祂要求祂 ê 門徒全款，耶穌 mā 要求咱 tiòh 思考咱生活 ê 目標。祂講：「我知 lín 想 beh siōng 親近我，m̄-koh，m̄-thang bē 記得我 ê 性命 siōng 基本 ê 要素，我 tú-chiah 已經有 kā lín 說明過 à。Lín 若 ài beh 做第一，tiòh 做眾人 ê 路尾，mā tiòh 做眾人 ê 差用。」

這 m̄ 是一個表面上 ê 原則，á 是一個無要無緊 ê tai-chì，這是基督教本身 ê 核心。

祈禱：耶穌 ah，我求祢赦免我 ê 自我中心，koh hō 我有氣力來改變。求祢 hō 我了解是啥物 hō 祢 ê 宣教 hiah-nih 有意義，tòh 是祢伸手援助 hiah-ê bē 吸引人 ê，kah hiah-ê siōng 欠缺 ê 人。我奉祢 ê 聖名，求祢幫助我 mā 全款 án-ne 做。阿們。

（1994.03.06）